

# Fasnacht 2019



## dr Hampe vo Kleihünige

### Im Fall...

...ich bi dr Hampe vo Kleihünige, ich ha e Schissfrisur  
E grauehafti Jagge und tramp umme, wiene Buur  
Lueg dri, wie nit ganz abgholt und schwätze dueni dräggslet  
Me het mi au scho mit dr Frau Aggermaa verwäggslet

...bir BVB ersetze si und fligge überall  
Am Bode unde d Weiche und au s Schiinematerial  
Mi dunggt, am Bode nutzt si nüt, die Weiche-Zuebereitig  
Ersetze sott me zerscht die Weiche in der Oberleitig

...mi Diesel isch e Grüsel gsi, doch meischstens het mr droht  
Dass ich am andre Dag nüm gwüsst ha, wo mi Auti schoht  
Drum hani jetz e Tesla, do isch d Suechi nüm dramatisch  
Bim Tesla laufsch em Kabel noo, no findschen automatisch

...dä Smog macht mit nit krangg, au d Grippewälle im April nit  
Kei Stress, kei Gift, kei Uspuff, au zäh Klöpfer uff em Grill nit  
Wemmi öppis krangg macht und mi schtändig losst erblasser  
Isch es jede Monet d Rächng vo dr Kranggekasse

...e Moslem und e fromme Jud, e Hindu und zwei Chrischte  
E Atheischt und nomol ein und denn no zwei Buddischte  
Die hogge zämme, lache mitenand am gliiche Tisch  
Das goht ihm Fall, hejo, wenn kein drvo e Arschloch isch

...wenn d Fetz jetz goht, bruucht Basel bald e neue Schtänderoot  
Die Rote hän d Frau Herzog, und kei Beat Jans im Boot  
Hei, Beat, wötttsch no Wahle gwünne, mach als gleini Handlig  
Dr SP z lieb no vor dr nöggste Wahl e Gschlächtsumwandlig

...ob Burckhardt odr Auderset, ob Gröflin ob Aditschi  
Schnuert ein im Grosse Root, denn sotts ab sofort Baseldytsch sii  
Weil unser Baseldeutsch die schönste aller Sprachen ischt  
Doch schnuure dien si au uff baseldytsch genau dr gliichi Mischt

... uns goht dr Somm verlore und mit ihm e rächtli Baz  
Und mit dr Baz und dr Novartis mänge Arbeitsplatz  
Au Tageswuche, Barfi.ch und Barfi-Delifonkabine, s Kaffi Schpilmaa,  
d Basler Hauptposcht und Theaterfalle, Unifächer, freii Parggplätz,  
Alts Warteck und Art in Basel, Muba, Hajek, Meischerkübel  
und die schöne Hafe-Beize kömme mir in Sinn  
Eso gseh isch dr Verluscht vom Markus Somm dr einzig Gwünn

...dr erschtli Mensch, dr Adam, jo, dä hätt als erschte Maa  
Für dass es paradisisch blibt, no gärn e Kumpel gha  
Doch dr Lieb Gott het druffab em Adam schüüch verrote  
Sorry, ha dr s Evi gmacht, wäg dr Fraequote

...dr Papscht diggtiert d Frauewält: Abort isch Ufftragsmord  
Was losst denn dä für Schissdrägg use, ghörsch vo Süd und Nord  
«Schissdrägg», nei, das seit me nit. Das lehrsch scho in dr Schuel  
Losst dr heilig Babbe öppis use, ischs dr heilig Schtuehl

...e Buschi schloft im Grosse Root, e riise Kataschrophe  
Und d Mamme, die wird usegheit, so eini muesch beschrotte  
E Riisegschrei, Tumult im Saal, mir wänn do keini Goofe!  
Wo s Buschi widr drin isch, könne alli witterschlofe

...das Radiosänder-Hochhuus dört bim Bahnhof SBB  
Das gliicht em Doggder Franggeschtei noch ere Ghirn-OP  
Und doch ischs no sympatisch, guet verdaulig, farbefroh  
Vergliche mit dem Schissprogramm vom Schwizer Radio

...ich ~~XXXX~~ uff ~~XXXX~~ uff jede Fall e ~~XXXX~~ ver-~~XXXX~~ am Bode  
Dä ~~XXXX~~ ~~XXXX~~ und au ~~XXXX~~ und zwor e ~~XXXX~~ und ~~XXXX~~ Methode  
Ich könn dä ~~XXXX~~ und ~~XXXX~~ ~~XXXX~~ voll, dä ~~XXXX~~ ~~XXXX~~ Gleidarschteller  
Dasch alles, woni z sage ha zum Thema Marco Schtreller

Wottsch au by uns bänggle?  
Uff [www.vsg-basel.ch](http://www.vsg-basel.ch) erfahrsch meh!

